

Abogadonan mr. Rudi Oomen y mr. Johan Sjiem Fat,

Henny Eman ta masha satisfecho cu veredicto di Corte di Apelacion

Riba peticion di nan cliente mr. Henny Eman abogadonan mr. Rudi Oomen y mr. Johan Sjiem Fat a duna e siguiente declaracion en conexion cu e desicion di Corte di Apelashon Comun di Husticia de Antiyas y Aruba di ayera den e caso di e bezwaarschrift di Henny Eman contra e dagvaarding di Ministerio Publico den e caso di e Fondo Desaroyo Nobo.

E dagvaarding ta contene 6 punto, di cual punto 2 te cu 6 ta consisti di acusacion di irregularidadnan cu supuestamente lo a worde cometi rond di dunamento di trabaonan na cierto contratista p'e proyecto FDN.

Punto 1 di e dagvaarding ta contene e acusacion cu fondonan di gobierno p'e proyecto FDN lo a worde paga sin cu nan tabata debidamente presupuesta, manera e Ley di Contabilidad ta rekeri.

Pa loke t'e irregularidadnan rond di dunamento di trabaonan na cierto contratista (punto 2 te cu 6 di e dagvaarding) Corte di Apelacion a dicidi cu no tin suficiente indicacion cu mr. Henny Eman tabata involvi den esei y p'e motibo ei e persecucion di Henny Eman dor di Ministerio Publico p'e delitonan aki no por sigi.

Pa loke t'e asunto di presupuesto bao di punto 1 di e dagvaarding, Corte di Apelacion a dicidi cu den cuadro di un bezwaarschriftprocedure no tin suficiente espacio y oportunidad pa investiga si e defensa di mr. Henny Eman mester worde honra.

Esei ta entre otro pasobra ta trata aki di un asunto legal hopi complica cu ta relata n'e Ley di Contabilidad y e articulan denCodigo Penal cu a worde introduci na 1999 al respecto. Ademas tin consehonan cu puntonan

di bista completamente opuesto di instancianan di gobierno over di e materia aki y no por huzga e consehonan aki debidamente den un bezwaarschriftprocedure.

Pesei Corte di Apelacion ta haya cu e punto aki mester worde evalua y dicidi dor di Corte den Prome Instancia den e asina yama bodemzaak.

Mr. Henny Eman ta sumamente satisfecho cu e desishon di Corte di Apelashon. E ta particularmente contento cu e dudanan cu por tabatin over di su integridad dor di e decision di Ministerio Publico pa persigui'e pa supuesto irregularidadnan den dunamento di trabaonan na varios contratista, a worde bari for di mesa dor di e decision di Corte di Apelacion y e hecho cu e no por worde persigui mas pa e delitonan aki.

Pa loke t'e asunto di presupuesto cu ta resta bao di punto 1 di e dagvaarding, locual ta mas bien un discusion academico over di e interpretacion corecto di cierto articulo den lei, mr. Henny Eman tin tur confianza cu esaki lo worde evalua debidamente den e asina yama bodemzaak dor di Corte den Prome Instancia, ya cu Henny Eman ta convenci cu e no a actua contra e Ley di Contabilidad ni contra e articulan denCodigo Penal, segun e abogadonan mr. Rudi Oomen y mr. Johan Sjiem Fat.

AWEMainta mester puntra, mirando e veredicto den e caso aki, ta kico Ministerio Publico a mira anto, pa a dagvaard Henny Eman den e caso aki. Aki ta trata di 3 Huez, y no di un Huez, cu a musta con Ministerio Publico no tabatin ningun derecho di atacha integridad di e.o. Henny Eman.